

四庫全書

集部

欽定四庫全書

集部

唐詩紀事卷

四十二

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣范承祖

欽定四庫全書

唐詩紀事卷四十

宋 計敏夫 撰

范傳正

薛存誠

賈島

馬異

張登

包佶

長孫佐輔

李正封

崔護

張又新

陸復禮

柳公權

陸鴻漸

王季則

王公亮

徐牧

陳存

范傳正

謝真人過舊山云麾蓋從仙府笙歌入舊山水流丹竈  
缺雲起草堂闢白鹿行為衛青鸞舞自閑種松鱗未立  
移石薛仍班望路煙霞外迴輿巖岫間豈唯遼西鶴空  
歎令威還

鮑溶人日陪宣州范中丞傳正與范侍御宴云人日春  
風綻早梅謝家兄弟看花來吳姬對酒歌千曲秦語留  
人酒百杯絲柳向空初宛轉玉山看日漸徘徊流光易  
去歡難得莫厭頻頻上此臺

傳正元和十二年廉問宣池遷李白墳於青山之陽為  
銘曰嵩岳降神是生輔臣蓬萊謫真斯為逸人晉有七  
賢唐稱八仙應彼星象唯公一焉晦以麴蘖暢於文編  
萬象奔乎筆端萬慮泯滅乎樽前卧必酒甕行唯酒舡  
吟風詠月席地幕天但貴適其所適不知夫所以然而  
然至今尚疑其醉在千日寧審乎壽終百年謝家山兮  
李公墓異代詩流同此路舊墳卑庠風雨侵新宅爽塏  
松栢林故鄉萬里且無嗣二女從民永於此猗歟琢石

為二碑一藏幽隧一臨岐岸深谷高變化時一存一毀  
名不虧

傳正為宣歙觀察頗事華侈憲宗知之代還拜光祿卿  
好古性情悍初自整飭官益達用度益奢傾貲貨市權  
貴驪私公府如家帑亦幸素有名不敗云

薛存誠

暮春自南臺丞再除給事中仍是本廳几榻杖屨宛然  
如舊云再入青瑣闈忝官誠自非拂塵驚物在開戶似

僧歸積草漸無逕殘花猶灑衣禁垣偏日近行坐是恩  
輝

盧綸同存誠登栖巖寺云蹇蹇步難前上山如上天塵  
泥來自晚猿鳥到何先萬壑應孤磬百花通一泉蒼蒼  
此明月下界正沉眠

存誠字資明河中人登貞元進士第和易容物而當官  
毅然不可奪元和末為御史中丞卒

賈島

字浪仙范陽人初為浮屠名無本能詩獨變格入僻似  
矯艷於元白來洛陽韓愈教為文去浮屠舉進士終普  
州司戶島久不第吟病蟬之句以刺公卿或奏島與平  
曾等為十惡逐之詩曰病蟬飛不得向我掌中行折翼  
猶能薄酸吟尚極清露華凝在腹塵點悞侵晴黃雀并  
烏鳥俱懷害爾情大中未授遂州長江簿初之任屆東  
川守者厚禮之島獻感恩詩曰匏革奏終非獨樂軍城  
未曉啟重門何時却入三台貴此日空知八座尊羅綺



舞間收雨點，貌貅闔外卷。雲根逐遷屬，吏隨賓列撥。棹扁舟，不忘恩自長。江遷普州司倉方干自鏡湖寄詩曰：亂山重復疊，何路訪先生。豈料多才者，空垂不第名。閑曹猶得醉，薄俸亦勝耕。莫問吟詩苦，年年芳草平。島至老無子，因啖牛肉得疾，終於傳舍。

延康吟云：寄居延壽里，為與延康隣。不愛延康里，愛此里中人人非十年，故人非九族。親人有不朽，語得之煙。

山春

望山詩云南山三十里不見踰一旬冒雨時立望望之  
如朋親虬龍一掬波洗蕩千萬春日日雨不斷怨殺望  
山人天事不可長勁風來如奔陰淫一已掃浩翠寫國  
門長安百萬家家張屏新誰家最好山我願為其鄰  
朝飢云市中有樵山此舍無朝煙井底有甘泉釜中乃  
空然我要見白日雪來塞青天立聞西牀琴凍折兩三  
絃飢莫詣他門古人有拙言

再投李益常侍云何處初投刺當時赴尹京淹留花柳

變然諾肺腸傾避暑蟬移樹高眠鴈過城人家嵩岳色  
公府洛河聲聯句逢秋盡嘗茶見月生新衣裁白紵思  
從曲江行

王建寄島詩云盡日吟詩坐忍飢萬人中覓似君稀  
僮眠冷榻朝猶卧驢放秋田夜不歸傍暖旋收紅落葉覺  
寒重著舊生衣曲江池畔時時到為愛鸕鷀雨裏飛

島詩有警句韓退之喜之其渡桑乾詩曰客舍并州三  
十霜歸心日夜憶咸陽如今更渡桑乾水却望并州是

故鄉

又赴長江道中詩曰策杖馳山驛  
逢人問梓州  
長江那日到  
行客替生愁  
晉公度初立第於街西興化里鑿池種竹起臺榭  
島方下第或以為執政惡之故不在選  
怨憤題詩曰破却千家作一池  
不栽桃李種薔薇  
薔薇花落秋風起  
荆棘滿庭君始知  
皆惡其不遜  
島為僧時洛陽令不許僧午後出寺  
賈有詩云不如牛與羊  
猶得日暮歸  
韓愈惜其才  
俾反俗應舉  
貽其詩云孟郊死  
葬北

却山日月星辰頓覺開天恐文章中斷絕再生賈島在

人間由是振名

或曰非退之詩

送長安惟鑒法師云誦經春色裡花繞御床飛南海幾  
回渡舊山臨老歸觸風香損印霑雨磬生衣雲水路迢  
遞往來消息稀

題杜司戶亭子云牀頭枕是溪中石井底泉通竹下池  
宿客未眠過夜半獨聞山雨到來時

題李欵幽居云閑居少鄰並草徑入荒村鳥宿池中樹

僧敲月下門過橋分夜色移石動雲根暫去還來此幽期不負言

哭栢嵒和尚云苔覆石牀新吾師去幾春寫留行道影焚却坐禪身塔院關松雪房門鎖隙塵自嫌雙淚下不

是解空人

永叔云焚却坐禪身乃是燒殺活和尚也

哭孟郊云身死聲名在多應萬古傳寡妻無子息破宅帶林泉塚近登山道詩隨過海船故人相吊後斜日下寒天普州有岳陽山島葬於此唐安程錡從事倅岳陽

有詩曰倚恃才難繼昂藏貌不恭騎驢衝太尹奪卷誤  
宣宗馳譽超前輩居官下我儂司倉舊曹署一見一心  
忡

唐末舉子李克恭有詩曰一一元微縹緲成盡吟方更  
爽神情宣宗謫去為閑事韓愈知來已振名海底也應  
搜得淨月輪常被翫教傾如何未隔四十載不過論量  
向此生

夜半長安雨燈前越客吟

贈吳處士句

島嶼夏雲起汀洲芳

草深句秋風吹渭水落葉滿長安句山鐘夜渡空江水

汀月寒生古石樓句舊國別多日故人無少年句右張

為取作主客圖

李洞過浪仙舊地云鶴外唐來有謫星長江東注冷滄  
溟境搜松雪仙人島吟歌林泉主簿廳片月已能臨榜  
黑遙天何益抱墳青年年誰不登高第未勝騎驢入畫  
屏

姚合寄島云寂寞荒原下南山只隔離家貧惟我並詩



好復誰知草色無窮處  
蟲聲少盡時  
朝昏鼓不到  
閑卧益相思

浪仙寄友人云一日不作詩  
心源如廢井  
筆硯為轆轤  
吟詠作縈綆  
朝來重汲引  
依舊得清冷  
書贈同懷人  
詞中作苦辛

島赴舉至京騎驢賦詩得僧推月下門之句欲改推作敲引手作推敲之勢未決不覺衝大尹韓愈乃具言愈曰敲字佳矣遂並轡論詩久之或云吟落葉滿長安之

句唐突大尹劉栖楚被繫一夕放之

馬異

送皇甫湜赴舉云馬啼聲特特去入天子國借問去是誰  
誰秀才皇甫湜吞吐一腹文八音兼五色主文有崔李  
郁郁為朝德青銅鏡必明朱絲繩必直稱意太平年願  
子長相憶

貞元旱歲云赤地炎都寸草無百川水沸煮蟲魚定應  
焦爛無人救淚落三篇古尚書

暮春醉中寄李千云歡異且交親酒生開甕春不須愁  
犯卯且乞醉過申折草為籌筓鋪花作錦裯嬌鶯解言  
語留客也慙慙

異河南人與盧仝結交荅仝結交詩云有鳥自南翔口  
銜一書札達我山之維開緘金玉煥陸離乃是盧仝結  
交詩此詩峭絕天邊格力與文星色相射長河拔作數  
條絲太華磨成一拳石莫嗟獨笑無往還月中芳桂難  
追攀况值亂邦不平年迴陵到谷如等閑與君俛首大

艱阻喙長三尺不得語因君今日形章句羨獼猴兮着  
衣裳悲蚯蚓兮安翅羽上天不失察仰我為遼天失所  
將吾劔兮切淤泥使良驥兮捕老鼠昨日脫身卑賤籠  
外星借與老人峰抱鋤築地芸芝术偃蓋參天舊有松  
我與松兮保身世臥居居兮起于于激潺潺兮聆嚶嚶  
道在其中可終歲不教辜負堯為帝燒我荷衣推我身  
回看天地如砥平鏗刀剝骨不辭去卑窮君子今明明  
俛首辭山心慘惻白雲雖收戀不得看雲且擬直須臾

疾風又卷西飛翼為報覃懷新結交死生富貴存後凋  
我心不畏朱公叔君意須防劉孝標以膠投漆苦不早  
就中相去萬里道河水悠悠山之間無由把袂攄懷抱  
憶全吟能文浴臭成蘭薰不知何處清風夕擬使張華  
見陸雲

張登

招客遊寺云江城吏散倦春陰山寺鳴鐘隔雨深招取  
遺民赴僧社竹堂分坐靜看心

小雪日戲題絕句云甲子徒推小雪天刺梧猶綠槿花  
然融和長養無時歇却是炎洲雨露偏

送王主簿遊南海云平生推久要留滯共三年明日東  
南路窮荒霧露天曠懷常寄酒素業不言錢道在貧非  
病時來醜亦妍過山乘蠟屐涉海附樓船行矣無為恨  
宗門有大賢

上巳泛舟詩云令節推元已天涯喜有期初筵臨泛地  
舊俗被禳時枉渚潮新上殘春日正遲竹枝遊女曲桃

葉渡江詞風鷓今方退沙鷗亦未疑且同山簡醉倒載  
莫寨帷

劉夢得有揚州春夜與李端公益張侍御登段侍御平  
仲同會水館對酒聯句詩登始以巾褐就辟歷衛佐廷  
評登貞元中為河南士曹遷殿院為漳州刺史坐公累  
受劾感疾卒權載之序其文曰清河張登剛潔介特不  
趨和從俗循性屬詞發為英華自河南士掾湍歲計相  
表為殿中侍御史董賦江南無何授漳州刺史居七年

坐公事受劾吏議侵誣肩臆約結感疾不起君疾卑調  
細人白黑太明矯枉憤厲往往過正故其賦有云鷓必  
闕而知斃龍雖屠而不馴又云賤而榮兮跌而喪痛一  
世之紛淪皆所以感憤頓挫放言叙心兆憂賈福常必  
由之二十年間數免稀遷志力相蓋斯亦從古才士之  
所患也道雖由己感於知己名不加入成必因人此登  
之語也

包佶



字幼正潤州人登進士第為諫議大夫坐善元載貶嶺南劉晏奏起為汴東兩稅使貞元中為詩寄劉長卿云波瀾喧眾口藜藿靜吾廬喪馬思開卦占鵲懶發書叙其遷謫之狀也

父融與賀知章張若虛張旭號吳中四士

酬于侍郎湖南見寄云桂嶺千崖斷湘流一派通長沙今賈傅東海舊于公章甫經殊俗離騷繼雅風金閨文作字玉匣氣成虹翰墨時無侶丹青夙在公主恩留左

掖人望積南宮巧拙循名異浮沉顧位同九遷歸上略  
三已契愚衷責謝庭中禮悲寬塞上翁楚材欣有適燕  
石愧無功山曉重嵐外林春苦霧中雪花翻海鶴波影  
到江楓去札頻逢信回帆早掛空避賢方有日非敢愛  
微躬

贈盧山白鶴觀劉尊師云蒼蒼五老霧中壇杳杳三山  
洞裏官手護崑崙象牙簡心推霹靂棗枝盤春飛雪粉  
加毫潤曉漱膏瓊冰去聲齒寒漸恨流年筋力少唯思露

晁事星冠

嶺下臥病寄劉長卿云唯有貧兼病能令親愛踈歲時  
空放逐身世付空虛脛弱秋添絮頭風曉廢梳波瀾喧  
衆口藜藿靜五虛畏馬思開卦占鴉懶發書十年江海  
隔離恨子知予

長孫佐輔

擬古詠河邊枯樹云野火燒枝水洗根數圍孤樹半心  
存應是無機承雨露却將春色寄苔痕

別友人云愁多不忍醒時別想極還尋靜處行誰遣同  
衾又分手不如行路本無情

德宗時人弟公輔為吉州刺史佐輔往依馬佐輔有傷  
故人歌妓云愁臉無紅衣滿塵萬家門戶不容身曾將  
一笑君前去悞殺幾多回顧人右張為取此詩作主客

圖

南中客舍對雨送故人歸北云猿聲啾啾鴈聲苦卷簾  
相對愁不語幾年客吳君在楚况送君歸我猶阻家書

作得不忍封北風吹斷堦前雨

杭州秋日別故友云相見又相別大江秋水深悲歡一  
世事去住兩鄉心浙澀籬下葉淒清階上琴獨隨孤棹  
去何處更同衾

代別後夢別云別中還夢別悲後更生悲覺夢俱千里  
追隨難再期翻思夢裏苦却恨覺來遲縱是非真事何  
妨夢會時

答邊信云征人去年戍遼水夜得邊書字盈紙揮刀就

燭裁紅綺結作同心答千里君寄邊書書莫絕妾答同心  
心心自結同心再解心不離書字頻看字愁滅結成一  
夜和淚封貯書只在懷袖中莫如書字固難久願學同心  
心長可同

對鏡吟云憶昔逢君新納聘青銅鑄出千年鏡意憐光  
彩固無瑕義比恩情永相映每將鑒面兼鑒心鑒來不  
輟情愈深君非結心空結帶結處尚新恩已背開簾覽  
鏡悲難語對面相看孟門阻掩匣徒慙雙鳳飛懸臺欲

效狐鸞舞昔日照來人共許今朝照罷自生疑鏡上有  
塵猶可拂君恩詎肯無迴時

山行書事云日落風颺颺駟車行遠郊中心有所悲古  
墓穿黃茅茅中狐兔窠四面烏鳶巢鬼火時獨出人煙  
不相交行行近破村一徑歌還坳迎霜聽蟋蟀向月看  
蟪蛄翁喜客來坐客來羞厨庖濁醪誇撥螳時果仍新  
苞相歡對寒爐呼兒熬枯梢性朴頗近古其言無斗筭  
憂歡世上并歲月途中拋誰知問津客空作揚雄嘲

古宮怨云窻前好樹名玫瑰去年花落今年開無情春  
色尚識返君心忽斷何時來憶昔粧成候仙杖宮鏤玲  
瓏日新上拊心却笑西子頰掩鼻誰憂鄭姬謗草染文  
章衣下履花粘甲乙牀前帳三千玉貌休自誇十二金  
釵獨相向盛衰傾奪欲何如嬌愛翻悲逐佞諛重遠豈  
能慙沼鵠棄前方見泣船魚看籠不記薰龍腦詠扇空  
曾禿鼠鬚始喜類蘿新託栢終傷如薺却甘荼院深獨  
開還獨閉鸚鵡驚飛苔覆地滿箱舊賜前日衣滴枕新



垂夜來淚恨多開鏡照還悲綠髻青娥尚未哀莫道新  
纈長絕比猶逢故劍會相追

李正封

洛陽清明日雨霽云曉日清明天夜來嵩少雨千門尚  
煙火九陌無塵土酒綠河橋春漏閑宮殿午遊人戀芳  
草半犯嚴城鼓

詠露云霏霏靈液重雲表無聲落霑樹急元蟬洒池棲  
皓鶴流塵清遠陌飛月澄高閣宵潤玉堂簾曙寒金井

索佳人比珠淚坐感空綃薄

唐文皇好詩大和中賞牡丹上謂程脩己曰今京邑人  
傳牡丹詩誰為首出對曰中書舍人李正封詩天香夜  
染衣國色朝酣酒時楊妃侍上曰粧臺前宜飲以一紫  
金盞酒則正封之詩見矣

夏遊招隱寺暴雨晚晴云竹栢風雨過蕭疎臺殿涼石  
渠瀉奔溜金刹照顏陽鶴飛巖煙碧鹿鳴澗草香山僧  
引清梵幡蓋繞迴廊

禪門寺暮鐘云竊竊高懸于闌鐘黃昏發地殷龍宮遊  
人憶到嵩山夜疊閣連樓倚太空

退之正封從軍有晚秋郾城聯句詩正封云從軍古云  
樂談笑青油幕燈明夜觀朞月暗秋城柝遂為警策正  
封字中護終監察御史

崔護

晚雞云黯黯嚴城罷鼓鞞數聲相續出寒棲不嫌驚破  
紗窓夢却恐為妖半夜啼

山雞舞石鏡云盧峰開石鏡人說舞山雞物象纖無隱  
禽情目自迷景當煙霧歇心喜錦翎齊宛轉烏呈彩婆  
娑鳳欲栖何言資羽族在地得天倪應笑鞠音者終朝  
飲敗醯

沈存中云唐人以詩主人物故雖小詩莫不熒揉極工  
而後已所謂旬鍛月鍊者信非虛言小說護題城南詩  
其始曰去年今日此門中人面桃花相映紅人面不知  
何處去桃花依舊笑春風後以其意未全語未工改第

三句曰人面祇今何處去至今所傳有此兩本惟本事詩作祇今何處在唐人作詩大率如此雖有兩今字不恤也取語意為主耳後人以其有兩今字故多行前篇

筆談

護舉進士不第清明獨遊都城南得村居花木叢萃叩門久有女子自門隙問之對曰尋春獨行酒渴求飲女子啓闔以盃水至獨倚小桃柯佇立而意屬殊厚崔辭起送至門如不勝情而入後絕不復至及來歲清明徑

往尋之門庭如故而戶扃鎖矣因題去年今日此門中  
之詩於其左扉

護字殷功貞元十二年登第終嶺南節度使

張又新

郡齋三月下旬作云春事日已歇池塘曠幽尋殘紅披  
獨墜初綠間淺深偃仰捲芳褥顧步愛新陰謀春未及  
竟夏初遽見侵

三月五日陪裴大夫泛長沙東湖詩云上已餘風景芳

辰集遠坳絲舟浮泛蕩綉轂下娉婷棲樹迴惹舊笙歌  
轉杳冥湖光迷翡翠草色醉蜻蜓鳥弄桐花日魚翻穀  
雨萍從今留勝會誰看畫蘭亭

五月水邊柳詩云結根挺涯溪垂影覆清淺睡臉寒未  
開嬾腰晴更軟搖空條已重拂水帶方展似醉煙景凝  
如愁月露泣絲長魚悞恐枝弱禽驚踐悵別幾多情含  
春任攀蹇

時號又新張三頭謂進士狀頭宏詞勅頭京兆解頭又

新嘗作廣陵從事有酒妓每致情焉後二十年罷江南  
郡舟道廣陵適李紳鎮淮南又新方懼其讎已而又遇  
風漂沒二子紳憫然復書曰端溪不讓之辭愚罔懷怨  
荆浦沉淪之事鄙實憫然宴遇殊厚前所謂酒妓者猶  
在席又新以拍染酒題盤上為詞曰雲雨分飛二十年  
當時求夢不曾眠今來頭白重相見還上襄陽玳瑁筵  
李即命妓歌以送酒

又新與揚虔州善楊妻李有德無容又新求婚於楊曰



得羨室足矣楊曰但與我同好定諧君心又新既成婚  
殊失望乃為詩曰牡丹一朵直千金將謂從來色最深  
今日滿欄開似雪一生辜負看花心看一作惜  
又新字孔昭薦之子附逢吉罷貶汀州刺史又附李訓  
訓死復坐貶終左司郎中

陸復禮

正元八年宏詞試中和節詔賜公卿尺詩云春仲令初  
吉歡娛樂大中皇恩貞百度寶尺賜羣公欲使方隅法

還令規矩同捧觀珍質麗拜受聖恩崇如荷止山重思  
酬分寸功從茲度天地與國慶無窮

是歲復禮第一人李觀裴度次之

柳公權

公權武宗朝在內廷上常怒一宮嬪久之既而復召謂  
公權曰朕怪此人若得學士一篇當釋然矣目御前蜀  
牋數十幅授之公權略不停思而成一絕曰不分前時  
忤主恩已甘寂寞守長門今朝却得君王顧重入椒房

拭淚痕上大悅令宮人上前拜謝之

文宗時充翰林學士從幸未央宮苑中駐蹕謂公權曰  
我有一喜事邊士衣賜久不及時今年二月給春衣訖  
公權前奉賀上曰可賀我以詩宮人迫其口進公權應  
聲曰去歲雖無戰今年未得歸皇恩何以報春日得春  
衣上悅激賞之

文宗夏日與諸學士聯句曰人皆苦炎熱我愛夏日長  
公權續曰薰風自南來殿閣生微涼五學士屬和帝獨

諷公權兩句辭清意足不可多得乃令公權題於壁上  
字方圓五寸帝視之嘆曰鍾王復生無以加矣公權字  
誠懸卒於太子太保

陸鴻漸

太子文學陸鴻漸名羽其先不知何許人景陵龍蓋寺  
僧姓陸於堤上得初生兒收育之遂以陸為氏及長聰  
俊多聞學贍辭逸恢諧辨捷性嗜茶始創煎茶法至今  
鬻茶之家陶為其像置於煬器之間云宜茶足利至大

和中復州有一老僧云是陸僧弟子常諷其歌云不羨  
黃金罍不羨白玉杯不羨朝入省不羨暮入臺唯羨西  
江水長向金陵下來鴻漸又撰茶經三卷行於代今為  
鴻漸形因目為茶神有售則祭之無則以釜湯沃之  
皇甫曾送鴻漸採茶相過詩云千峰待逋客香茗復叢  
生採摘知深處煙霞羨獨行幽期山寺遠野飯石泉清  
寂寂然燈夜相思一磬聲

吳門有辟疆園地多怪石鴻漸翫月詩云辟疆舊林閨

惟石終相向

權載之送陸太祝赴湖南幕詩云不憚征路遙定緣賓  
禮重新知折柳贈舊侶乘藍送此去嘉句多楓江接雲

夢

按鴻漸自太子文學徒  
太常寺太祝不就職

王季則

魚上冰云北陸收寒盡東風解凍初冰消通淺溜氣變  
躍潛魚應節似知化揚鬢任所如浮沉非樂藻汭泝異  
傳書綴網時空久臨川意有餘為龍將可望今日愧才

虛

李則登元和進士第

王公亮

魚上冰詩云春生寒氣減稍動久潛魚乍喜東風至來  
看曲岸初出冰朱鬣見望日錦鱗舒漸覺流漸近還欣  
掉尾餘噉喁情自樂泔沂意寧踈儻得隨鱗化終能上  
太虛

公亮登正元進士第長慶初上兵書十八卷自司門郎

中為商州刺史制云茂於學精於文文學之外有折毫  
刺鐘之用自佐戎律領郡符持憲為郎皆稱厥職命以  
為商州以爾精敏當自得中

徐牧

臨淵羨魚詩云清泚濯纓處今來喜一臨慙無下釣處  
空有羨魚心退省時頻改謀身歲屢沉鬣成川上媚網  
就水寧深頰尾臨波裏朱鬚破浪濤此時儻不漏江上  
免行吟



陳存

穆陵路詩云西遊匣長劍日暮湘楚間歇馬上秋草逢  
人問故關孤村綠塘水曠野白雲山方念此中去何時  
此路還

寓居武丁館云暑雨颺已過涼飈觸幽衿虛館無喧塵  
綠槐多晝陰俯視古苔積仰聆早蟬吟放卷一長想閑  
門千里心

送劉秀才南歸詩云鳥啼楊柳垂此別千萬里古路入

商山春風生灞水停車落日在罷酒離人起進戶寄龍  
沙送歸情詎已

存大歷正元間詩人

唐詩紀事卷四十

欽定四庫全書

唐詩紀事卷四十一

宋 計敏夫 撰

白行簡

章孝標

施肩吾

鮑溶

孟簡

李程

張蕭遠

許康佐

許堯佐

張南史

徐凝

朱晝

侯喜

蔣防

白行簡

春從何處來詩云欲識春生處先從木德來入門潛報

柳度嶺暗驚梅透雪寒光散銷冰水鏡開曉迎郊騎發  
夜逐斗光回淑氣空中變新聲雨後催偏宜資律呂應  
是候陽臺

在巴南望郡南山云臨江一嶂白雲間紅綠層層錦綉  
班不作巴南天外意何殊昭應望驪山樂天和云返照  
前山雲樹明從君苦道似華清試聽腸斷巴猿叫早晚

驪山有此聲

時樂天  
在忠州

九日作云降敵意何如窮荒九日初三秋異鄉客一紙

故人書對酒情無限  
開緘思有餘  
感時空寂寞  
懷舊幾躊躇  
鴈盡平沙迥  
煙銷大漠虛  
登臺南望處  
掩淚對雙魚

行簡以瀘水羅賦得名  
其警句云  
焦螟之生必全有  
以小為貴者  
江漢之流雖大  
盡可以一貫之  
又曰  
夕掛于壁如滿月  
之在天  
曉用於人  
狀圓荷之映水

行簡字知退  
敏而有詞元  
和二年登第  
為度支郎中  
寶歷二年卒

行簡小字阿怜樂天同宿湖亭詩云潯陽少有風情客  
招宿湖亭盡却迴水檻虛涼風月好夜深惟有阿怜來  
行簡恩賜章服樂天以詩寄之云吾年五十加朝散爾  
亦今年賜服章齒髮恰同知命歲官銜俱是客曹郎予  
弟年五十賜緋俱是主客郎官榮傳錦帳花驂萼彩動綾袍鴈趨行大  
抵着緋宜老大莫嫌秋鬢數莖霜

章孝標

孝標元和十三年下第時輩多為詩以刺主司獨孝標

為歸燕詩留獻侍郎庾承宣得詩展轉吟諷庾果重典  
禮曹孝標來年登第詩云舊壘危巢泥已落今年故向  
社前歸連雲大厦無棲處更望誰家門戶飛孝標及第  
除正字東歸題杭州樟亭驛云樟亭驛上題詩客一半  
尋為山下塵世事日隨流水去紅花還似白頭人初成  
落句云紅花真笑白頭人改為還似且曰我將老成名  
似我芳艷詎能久乎及還鄉而逝或曰前有八元後有  
孝標皆桐廬人復同姓而皆不達矣李紳鎮揚州請孝

標賦春雪詩命題於臺盤上孝標唯然索筆一揮云六  
出花飛處處颺粘窓拂砌上寒條朱門到晚難盈尺盡  
是三軍喜氣銷

孝標及第後寄紳曰及第全勝十改官金鞍鍍了出長  
安馬頭漸入揚州郭為報時人洗眼看紳以一絕箴之  
曰假金方用真金鍍若是真金不鍍金十載長安得一  
第何須空腹用高心

孝標大和中山南東道從事試大理評事



明日鑿輿欲向東守宮金翠帶愁紅九門佳氣已西去

千里花開一夜風

無題

右張為取詩為主客圖

歸海上舊居云鄉路繞蒹葭紫紆出海涯人衣被蜃氣  
鳥跡印塩花草沒題詩石潮推坐釣槎還歸舊窓裡凝  
思賞煙霞

長安秋日云田家無五行水旱卜蛙聲牛犢乘春放兒  
孫候暖耕池塘煙未起桑柘雨初晴歲晚香醪熟村村

自送迎

右二詩韋莊又九集

施肩吾

肩吾洪州人元和十年登第以洪州西山羽化之地慕  
其真風高蹈於此為詩奇麗著百韻山居詩才情富贍  
如荷翻紫蓋搖波面蒲瑩青刀挿水湄又煙粘薜荔龍  
鬚軟雨壓芭蕉鳳翅垂

又贈邊將詩曰輕生奉國不為難戰苦身多舊箭瘢玉  
匣鎖龍鱗甲冷金鈴襯骨羽毛寒皂貂擁出花當背白  
馬騎來月在鞍猶恐邊人窺近塞柳營時把陣圖看

又上禮部侍郎陳情云九重城裏無親識八百人中獨  
姓施弱羽飛時攢箭險蹇驢行處薄冰危晴天欲照盆  
難反貧女如花鏡不知却向從來受恩地再求青律變  
寒枝

又贈友人下第閑居云花眼綻紅斟酒看藥心抽綠帶  
煙鋤皆輕巧之極

惜花云落盡萬株紅無人解繫風今朝芳徑裏惆悵錦  
機空

隋曲有踈勒鹽唐曲有突厥鹽阿鵲鹽或云關中人謂  
好為鹽故肩吾詩云顛狂楚客歌成雪媚賴吳娘笑是  
鹽蓋當時語也今杖鼓譜中尚有炎杖聲

效古興云金雀無舊釵綉綺無舊裾唯有一寸心長貯  
萬里夫南軒夜蟲織已促北牖飛蛾遶殘燭祇言衆口  
鑠千金誰信獨愁銷片玉不知歲晚歸不歸又將啼眼  
縫征衣

夜宴曲云闌缸如畫曉不眠玉爐夜起沉香煙青娥一

行十二仙欲笑不笑桃花燃碧窗弄嬌梳洗晚戶外不  
知雲漢轉被郎嗔罰屠酥盞酒入四肢紅玉軟

肩吾有年來如拋梭不老應不得之句又及第後過揚  
子江詩云憶昔將貢年抱愁此江邊魚龍互閃鑠白浪  
高於天今日步青草還來經此道江神也世情為我風  
色好右張為取作主客圖

張籍贈詩云世間漸覺無多事難得空名未着身合取  
藥成相待喫不須先作上天人又送肩吾東歸云知君

本是煙霞客被薦因來城闕間  
世業偏臨七里瀨仙遊  
多在四明山早聞詩句傳人徧  
新得科名到處開惆悵  
灞亭相送去雲中琪樹不同攀

鮑溶

岐路詩云北風送微寒徒侶勤  
遠程憂人席不暖殘月  
馬上明颺颺岐路間長見日  
初生重嶂曉色淺踈猿寒  
啼清人間多岐路常恐終身  
行迴見四方人車輪無留  
聲空谷亦堪隱下田非懶耕  
古人有遺訓飽食非親榮

我生禮義鄉，少小見太平。聖賢猶羈旅，况復非其名。  
長城作云蒙，公塲生人北。築秦氏寃禍，興蕭牆內萬重。  
防禍根，城成六國亾。宮闕啓千門，生人半為土。何用空  
中原，奈何家天下。骨肉尚無恩，投沙擁海水。安得久不  
翻，乘高慘人塊。寒日易黃昏，枯骨貫朽鐵。沙中如有言，  
萬古驪山葬誰知。野火燼。

秋暮山中寄李益端公云舊事與日遠，秋花仍舊香。前  
年綉衣客，此節過此堂。侍臣不自高，笑解綉衣裳。眠雲

有餘態入鳥不亂行我恐雲嵐色損君鞍馬光君言此  
何言且共覆前觴古人重一笑買日輕金裝日盡秉燭  
遊千年不能忘君言此何言明日皆異鄉明日非今日  
山下道路長一從山下去天地再炎涼此期果難得夢  
君馬元黃

許渾過鮑溶宅有感云寥落故人宅重來身已亾古苔  
殘墨沼深竹舊書堂秋色館池靜雨聲雲木涼無因展  
交道日暮倍心傷



溶登元和進士第與韓愈李正封孟郊友善

溶有途中句云躍馬非壯歲報恩無高功斯言化為火  
日夜焚深衷又上太原王尚書云天王委管籥開閉秦  
北門頂戴日月光口宣雨露言又秋懷句云萬里岐路  
多一身天地窄右張為主客圖取溶為工用博解宏拔  
主

孟簡

惜分陰詩云業廣因功苦拳拳志士心九流難酌挹四

海易消沉對景嗟移晷窺園詎改陰三冬勞聚學駟景  
重兼金刺股情方勵偷光思益深再中如可冀終嗣絕  
編音

元和中簡將試詣日者卜之曰近東門坐即得之矣既  
入即坐西廊迫晚忽得疾隣坐請與終篇見其姓即東  
門也乃擢上第

簡字幾道德州人元和中為戶部侍郎以贓貶後以太  
子賓客分司卒尤工詩尚節義

簡擬古云劍客不誇貌主人知此心但營織毫義肯計  
千萬金勇則看鷲擊憤來聽虎吟平生貴壽德刃敵無  
幽深

李程

程貞元中試日五色賦破題云德動天鑒祥開日華其  
卷已黜楊於陵質之主文呂謂於是已落重收

詠冰壺云琢玉性惟堅成壺體更圓虛心含衆象應物  
受寒泉溫潤資天質清真稟自然日融光自散雪映色

逾鮮至鑒功寧宰無私照豈偏明將水鏡對白與粉闈  
連拂拭終為美提携佇見傳勿令毫髮累遺恨綴成篇  
程字表臣為翰林學士日過八埒乃至時號八埒學士  
寶歷二年為相最為帝所重曰高飛之翮長者在  
前卿朝廷羽翮也

張蕭遠

履春冰詩云一步一愁新輕輕恐陷人薄光全透日殘  
影半銷春蟬想行時翼魚驚躍處鱗底虛難駐足岸濶

怯廻身豈暇踟躕久寧辭顧盼頻顧將兢慎意從此赴  
通津

觀燈云十萬人家火燭光門門開處見紅粧歌鐘喧夜  
更漏暗羅綺湍街塵土香星宿別從天畔出蓮花不向  
水中芳寶釵驟馬多遺落依舊明朝在路傍

蕭遠元和進士登第與舒元興聲價俱美

秦雲寂寂僧還定盡日無人鹿遶牀句日暮風吹官渡

柳白鴉飛出石頭牆廢城句

雙雙白燕入祠堂

乳石洞玉女祠句

右張為取作主客圖

張籍有弟蕭遠雪夜同宿詩云數卷新遊蜀客詩長安  
僻巷得相隨草堂深夜携琴宿說似青城館裏時

許康佐

白雲起封中詩云英英白雲起呈瑞出封中表聖寧依  
地逢時豈待風浮輝彌皎潔流影忽冲融自叶堯天美  
誰言漢日同泥金光乍掩檢玉氣俄通猶願非煙瑞亭  
亭不散空

元稹酬許五康佐詩云猿啼三峽雨蟬報兩京秋珠玉  
慙新贈芝蘭忝舊遊他年問狂客須向老農求

康佐以中書舍人為翰林侍講學士與王起皆為文宗  
寵禮帝讀春秋至閹弑吳子餘祭問閹何人耶康佐以  
中官方彊不敢對帝嘻笑後問李訓訓曰國君不近刑  
人以為輕死之道帝曰朕近刑人多矣得不慮哉訓曰  
列聖知而不能遠惡而不能去陛下念之宗廟福也於  
是內謀翦除矣康佐終於禮部尚書

許堯佐

堯佐金谷懷古云石氏遺文在淒涼見故園清風思奏  
樂衰草念行軒舞榭蒼苔掩歌臺落葉繁斷雲歸舊  
壑流水咽新源曲沼殘煙斂叢篁宿鳥喧唯餘池上月  
猶似對金樽

康佐諸弟皆第進士而堯佐最先進又舉宏詞為太子  
授書郎八年康佐繼之

堯佐貞元十六年與燉煌張宗本滎陽鄭權皆佐征西



府後位諫議大夫卒

張南史

陸勝宅秋暮雨中探韻云同人永日自相將深竹閑園  
偶辟疆已被秋風交憶鱸更聞寒雨勸飛觴歸心莫問  
三江水旅服徒霑九月霜醉裡欲尋騎馬路蕭條幾處  
有垂楊

送朱大北遊云歲暮一為別江湖聊自寬且無人事變  
誰為客行難郢曲怜公子吳州憶伯鸞蒼蒼遠山際松

樹獨宜寒

南史好奕碁其後折節讀書遂入詩境李端哭之云諫  
草文猶在圍碁智不如高仲武云張君奕碁者中年感  
激苦節學文數年間稍入詩境如已被秋風教憶鱸更  
聞寒雨勸飛觴事與物力俱矣

南史字季直幽州人以試叅軍避亂居揚州揚子再召  
未赴而卒

錢起贈南史云紫泥何日到滄州笑向東陽沈隱侯

色晴峰雲外出，縠紋江水縣前流。使臣自欲論公道，才子非關厭薄遊。溪畔秋蘭雖可佩，知君不得少停舟。

徐凝

范攄言樂天為杭州刺史，令訪牡丹，獨開元寺僧惠澄近於京師得之，植於庭。時春景方深，惠澄設油幕覆其上，會凝自富春來，未識白先題詩曰：此花南地知難種，慙愧僧開用意栽。海燕解憐頻睥睨，胡蜂未識更徘徊。虛生芍藥徒勞妒，羞殺玫瑰不敢開。唯有數苞紅萼在。

含芳只待舍人來白尋到寺看花乃命徐同醉而歸時  
張祐榜舟而至二生各希首薦白曰二君論文若廉白  
之闕鼠穴勝負在於一戰也遂試長劍倚天外賦餘霞  
散成綺詩試訖解送凝為元祐次耳祐曰祐詩有地勢  
遙尊岳河流側讓關又題金山寺詩曰樹影中流見鐘  
聲兩岸聞雖碁母潛云塔影挂青漢鐘聲和白雲此句  
未為佳也凝曰美則美矣爭如老夫今古長如白練飛  
一條界破青山色凝遂擅場祐歎曰榮辱糾紛亦何常

也遂行歌而邁凝亦鼓柷而歸自是二生不隨鄉賦矣  
白又以祜宮詞四句皆數對未足竒也後杜牧守秋浦  
與祜為詩酒友酷吟祜宮詞以白有非祜之論常不平  
之乃為詩以高之曰誰人得似張公子千首詩輕萬戶  
侯又云如何故國三千里虛唱歌詞滿六宮杜盛言其  
美者欲以苟異於白而曲成於張也故牧又著論言近  
有元者喜為淫言媒語鼓扇浮囂吾恨方在下位未能  
以法治之斯亦數佐於祜耳潘若冲郡閣雅談云凝官

至侍郎多吟絕句曾吟廬山瀑布鱸炙人口又題處州  
縉雲山黃帝上昇之所鼎湖蓋黃帝鑄鼎處也有池在  
山頂詩云黃帝旌旗去不廻空餘片石碧崔嵬有時風  
卷鼎湖浪散作晴天雨點來自後無敢題者凝送馬向  
遊蜀云遊子去咸京巴山萬里程白雲連鳥道青嶂遞  
猿聲雨露經泥坂煙花望錦城工文人共許應記蜀中  
行

送李補闕歸朝云駟牡歸城闕雙鳧去海門還從清切

禁再沐聖明恩禮樂中朝貴文章大雅存江湖多旅逸  
獻替欲誰論

問漁叟云生事同漂梗機心在野船如何臨逝水白髮  
未忘筌

樂天薦徐凝屈張祐論者至今鬱鬱或歸白之妒才也  
余讀皮日休論祐云祐元和中作宮體詩辭曲艷發當  
時輕薄之流艷其才名譟得譽及老大稍闕建安風格  
誦樂府錄知作者本意誦諷怨誦時與六義相左右此

為才之最也。祐初得名，乃作樂府艷發之詞，其不羈之狀，往往間見。凝之操履不見於史，然方干學詩於凝，贈之詩曰：吟得新詩草裏論，戲反其辭謂村裏老也。方干世所謂簡古者，且能譏凝則凝之朴畧，推魯從可知矣。樂天方以實行求才薦凝，而抑祐其在當時理宜然也。令狐楚以祐詩三百篇上之，元稹曰：雕蟲小技，或獎激之，恐害風教。祐在元白時，其譽不甚，持重杜牧之刺池州，祐且老矣。詩益高名，益重。然牧之少年所為亦近於



祐為祐恨白理亦有之余嘗謂文章之難在發源之難也元白之心本乎立教乃寓意於樂府雍容宛轉之詞謂之諷諭謂之閑適既持是取大名時士翕然從之師其詞失其旨凡言之浮靡艷麗者謂之元白體二子規規攘臂解辨而習俗既深牢不可破非二子之心也所以發源者非也可不戒哉

青山舊路在白首醉還鄉

別白公句

試到第三橋便入千頃

花句高景爭來草木頭  
一生心事酒前休  
山公自是山

人侶携手醉登城上樓

答白  
公句

右張為取作主客圖

朱畫

贈友人古鏡云我有古時鏡初自壞陵得蛟龍猶泥蟠  
魑魅幸月蝕摩久見菱藻青於藍水色從君將照心  
無使心受惑

喜陳懿老示新製云一別一千日一日十二憶苦心無  
閑時今夕見玉色玉色復何異紅明含羣德有文如星  
宿飛入我胸臆憂愁方破壞懽喜重補塞使我心貌全

且非黃金力將攀下風手願假仙鸞翼

予欲見詩人孟郊故寄識於此

賦得花藤藥合寄穎陰故人云藤生南海濱引蔓青且  
長剪削為花枝何人無文章非才亦有心割骨聞餘芳  
繁葉落何處孤貞在中央願盛黃金膏寄與青眼郎路  
遠莫知意水深天蒼蒼

晝元和間進士

侯喜

劉師服軒轅彌明

韓退之石鼎聯句詩序云元和七年十二月四日衡山

道士軒轅彌明舊與進士劉師服衡山中相識師服在

京夜抵其居宿有校書郎侯喜新有能詩聲夜與劉說

詩彌明拍爐中石鼎曰子能為我賦此乎喜即援筆賦

之彌明繼馬詩曰妙匠斲山骨剗中事煎烹師服直柄未

當權塞口且吞聲喜龍頭縮菌蠢豕腹脹膨膨彌明外苞

乾辭丈中有暗浪驚師服在冷安自足遭焚意彌亨喜謬

當鼎彘間妄使水火爭彌明大若烈士膽圓如戰馬纓師服

上比香爐尖下與鏡面平喜秋菘未落蒂凍芋彊抽萌

彌明

一塊元氣間細泉幽竇傾師服不值輸寫處焉知懷抱

清喜

方當洪爐然益見小器盈彌明眈眈無及跡團團類

天成遙疑龜負圖出曝曉正晴喜旁有雙耳穿上為孤

髻撐

彌明

或訝短尾鉞又似無足鐙師服可惜寒食毬擲在

路傍坑喜

何當出灰地無計離瓶甕師服陋質荷斟酌狹

中貴提擎

師服

豈能煮仙藥但未污羊羹喜形模婦女笑

量度兒童輕

彌明

徒爾堅重性不過升合盛傍似廢轂仰

側見折軸橫

喜

時於蚯蚓竅微作蒼蠅鳴

彌明

以茲翻溢

愆實負任使誠

師服

常居顧盼地敢有漏泄情寧依暖熱

弊不與寒涼并

彌明

區區徒自效瑣瑣不足呈

師服

廻旋但

兀兀開合唯鏗鏗喜全勝瑚璉貴空有口傳名豈比俎

亘古不為手所橙磨礮去圭角浸潤著光明願君莫嘲

謂此物方施行

四韻並是彌明作也

始師服援筆題首句授喜喜

綴其下云云道士笑曰子詩如是而已乎即袖手竦肩

傍北牆坐謂劉曰吾不解世俗書弟子為我書吾句因

高吟龍頭豕腹一聯初不似經意詩自有似譏喜二子

相顧慙駭欲以多窮之道士不用意益切竒出不可附  
說皆侵劉侯二子思竭不能續道士曰章不可不成命  
劉把筆唱出四十字為八句讀畢謂二子曰此皆不足  
與語此寧為文耶吾所聞子皆不足聞也二子驚悅自  
失

蔣防

春風扇微和詩云麗日催遲景和風扇早春暖浮丹鳳  
闕韶媚黑龍津澹蕩迎仙仗霏微送畫輪綠搖宮柳散

紅待禁花新舞席  
皆迴雪歌筵暗送塵  
幸當陽律候惟  
頷及佳辰

望禁苑祥光詩云嘉瑞生天色  
葱龍幾效祥樹搖三殿  
側日映九城傍仙霧今同色  
卿雲未可章拱汾疑鼎氣  
臨渭比熒光豈並春風舊  
俄同聖壽長微臣時一望短  
羽欲翱翔

冬至日祥風應候詩云節逢清景  
空氣占二儀中獨喜  
登高日先知應候風  
瑞呈光舜化慶表盛堯聰  
况與承



時叶還將入律同徵微萬井逼習習九門通遠殿爐煙  
起殷勤報歲功

杜賓客永豐里新居云退蹟居三迳辭榮繼二疎聖情  
容解印帝里許懸車已去龍樓籍猶分御廩儲風泉輸  
耳目松竹助元虛調護心常在山林思有餘應嗤紫芝  
客遠就白雲居

元和中李紳及防薦龐嚴為翰林學士李逢吉誣紳罪  
逐之出嚴刺信州防刺汀州于敖封還詔書搢紳意伸

其在曰于給事犯宰執之怒申龐蔣之屈不亦善乎奏  
下乃論貶嚴太輕衆嗤譟防作連州廖先生碑銘云長  
慶末余自尚書司封郎中知制誥翰林學士出守臨江  
尋改此郡

唐詩紀事卷四十一

欽定四庫全書

唐詩紀事卷四十二

宋 計敏夫 撰

王涯

令狐楚

張仲素

王涯

獻壽詞云宮觀參差列九重  
祥雲瑞氣捧階濃  
微臣欲獻南山壽  
遙指南山對袞龍

遊春詞云曲江絲柳變煙條  
寒谷冰隨暖氣消  
纔見春先生綺陌已聞清樂動雲韶

經過柳陌與桃蹊尋逐春光著處迷  
鳥度時時衝絮起  
花繁袞袞壓枝低

秋思云綠軒涼吹動輕衣  
夜聽更長玉漏稀  
月渡天河  
光轉濕鵲驚秋樹葉頻飛

宮連太液見滄波  
暑氣微消秋意多  
一夜輕風蘋末起  
露珠翻盡滿池荷

從軍辭云髦頭夜落捷書飛  
來奏金門着賜衣  
白馬將  
軍頻破敵黃龍戍卒幾時歸

塞下曲云辛勤幾出黃花戍  
迢遞初隨細柳營  
塞晚每愁殘月苦  
邊愁更逐斷蓬聲

年少辭家從冠軍  
金裝寶劍去邀勳  
不知馬骨傷寒水  
唯見龍城起暮雲

平戎辭云太白秋高助發兵  
長風夜卷敵塵清  
男兒解却腰間劍  
喜見從王道化平

塞上曲云塞卒常為敵邊聲  
已報秋平生多志氣  
箭底寬封侯

從軍辭云戈甲從軍久風雲識陣難今朝拜韓信計日  
斬成安

燕頷多奇相狼頭敢犯邊寄言班定遠正是立功年

隴上行負羽到邊州鳴笳度隴頭雲黃知塞近草白見  
邊秋

閨人贈遠花明綺陌春柳拂御溝新為報遼陽客流芳  
不待人

遠成功名薄幽閨年貌傷妝成對春樹不語淚千行

形影一朝別煙波千里分君看望君處祇是起行雲  
戴勝飛晴野凌浙下濁河春風樓上望誰見淚痕多  
春江曲搖漾越江春相將看白蘋歸時不覺夜出浦月

隨人

家寄征江岸征人幾歲遊不如潮水信每月到沙頭  
乘曉南湖去參差疊浪橫前洲在何處露裏鴈嚶嚶  
塞下曲三戍漁陽再渡遼驛弓在臂劍橫腰匈奴欲似  
知名姓休傍陰山更射鵰

獵馬千羣，鴈幾雙燕。然山下碧油幢，傳聲漠北。單于破  
火照旌旗，夜受降。

朔雪飄飄，開鴈門平莎。歷亂卷蓬根，功名恥計擒生數。  
直斬樓蘭，報國恩。

隴水潺湲，隴樹秋征人。到此泪雙流，鄉關萬里無因見。  
西戍河源，早晚休。

陰磧茫茫，塞草腓桔槔。烽上暮煙飛，關河北望天連海。  
蘇武曾將漢節歸。



漢苑行二月春風變柳條九天清樂奏雲韶  
蓬萊殿後花如錦紫閣街前雪未銷

迴鴈高翻太液池新花低發上林枝  
年光到處皆堪賞春色人間總未知

春風澹蕩影悠悠鶯囀高枝燕入樓  
千步迴廊聞鳳吹珠簾處處上銀鈎

閨思云洞房今夜月如練復如霜  
為照離人恨亭亭到曉光

涯字廣津博學工屬文梁蕭陸贄異其才元和中為相  
又相穆宗至文宗時李訓敗遂及禍

令狐楚

宮中樂云楚塞金陵靖巴山玉壘空萬方無一事端坐  
大明宮

雪霽長楊苑冰開太液池宮中行樂日天下盛明時  
柳色煙相似梨花雪不如春風空有意一一麗皇居  
月上宮花靜煙含遠樹深銀臺門已閉仙漏夜沉沉

九重青鎖闥百尺碧雲樓  
明月秋風起珠簾上玉鈎  
遠別離云楊柳黃金穗  
梧桐碧玉枝春來消息斷  
早晚是歸時

玳織鴛鴦履金裝翡翠簾  
畏人相借問不擬到城南  
遊春辭云曉遊臨碧殿  
晚日上春亭芳樹羅仙苑  
晴山展翠屏

一夜好風吹新花  
一萬枝風前調玉管  
花下簇金羈  
長相思云君行登隴上  
妾夢在閨中  
玉箸千行落銀牀

一半空

綺席春眠覺紗窓曉望迷朦朧殘夢裡猶自在遼西

年少行云少小邊城慣放狂驍騎蕃馬射黃羊如今  
老無筋力猶倚營門數鴈行

家本清河住五城須憑弓箭覓功名等閑飛鞚秋原上  
猶向寒雲試射聲

弓背霞明劍照霜秋風走馬出咸陽未收天子河源地  
不擬回頭望故鄉

霜滿庭中月滿樓  
金樽玉柱對清秋  
當年稱意湏為樂  
不到天明未肯休

從軍行云荒鷄隔水啼  
汗馬白風嘶  
終日隨旌旆  
何時罷鼓鼙

孤心眠夜雪  
滿眼是秋沙  
萬里猶防塞  
三年不見家  
却望水河濶  
前登雪嶺高  
征人幾多在  
又擬戰臨洮  
胡風千里驚  
漢月五更明  
縱有還家夢  
猶聞出塞聲  
暮雪迷青海  
陰霞覆白山  
可怜班定遠  
生入玉門關

塞下曲云雪滿衣裳冰滿鬚  
曉隨飛將伐單于平生志  
氣今何在把得家書淚似珠

邊草蕭條塞鴈飛  
征人南望盡  
霜衣黃塵滿  
面長須戰  
白髮生頭未得歸

思君恩云小苑鶯歌歇  
長門蝶舞多  
眼看春又去  
翠輦  
不經過

紫禁香如霧  
青天月似霜  
雲韶何處奏  
祇是在昭陽  
鷄鳴天漢曙  
鶯語禁林春  
誰入巫山夢  
唯應洛水神

王昭君云錦車天外去毳幕雪中開魏闕蒼龍遠蕭關  
赤鴈來

仙娥今下嫁驕子自同和劔戟歸田盡牛羊繞塞多

望春辭云高樓望見一花開便覺春光四面來曉日晴  
雲知次第東風不用更相催

雲霞五采浮天闕梅柳千般夾御溝不上黃山南北望  
豈知春色滿神州

楚久為太常博士詩云何日居三署終年尾百寮世傳

之立春後言懷招李庭衙推云開齋夜擊唾壺歌試望  
夷門奈遠何每聽塞笳離夢斷時窺清鑑旅愁多稍驚  
宵漏丁丁促已覺春風習習和海內故人君最老花間  
鞭馬更相過

節度宣武酬樂天夢得云蓬萊仙監

樂天

客曹郎

劉為主客

曾

枉高車客大梁見擁旌旃治軍旅知親筆硯事文章愁  
看柳色懸離恨憶遞花枝助酒狂洛下相逢肯相寄南  
金韃錯玉淒涼劉詩云曾經謝病客遊梁今日相逢憶



李王少有一身兼將相更能四面占文章白詩云馬頭  
拂柳時回轡豹尾穿花暫亞槍誰引相公開口笑不逢  
白傳與劉郎

楚自翰林學士拜相子絢自湖州召入翰林為學士間  
歲拜相渭南尉趙嘏獻詩曰鸚在卿雲水在壺代天才  
業奉許謨榮同伊陟傳朱戶秀比王商入畫圖昨夜星  
辰為劍履前年風月滿江湖不知機務時多暇猶許詩  
家屬和無

貞元七年杜黃裳知舉徵服訪名士於尹樞樞言子弟  
有崔元略孤進有林藻令狐楚其年樞冠榜試珠還合  
浦賦藻賦成夢人謂曰何不叙珠來去之意既寤改之  
黃裳謂藻曰叙珠來去如有神助是年楚第五藻第十

一

楚字毅士德榮之裔與李逢吉善元和末為相敬宗逐  
李紳楚自宣武節度徙天平入為左僕射開成間卒楚  
遊義興寺寄上李逢吉相公云柳營無事詣蓮宮

相公  
久住

此步步猶疑是夢中勞役徒為萬夫長閑遊曾與二人  
寺  
同鸞鳳飛去仙巢在龍象潛來誼席空松下花飛頻佇  
立一心千里憶梁公

遊晉祠  
李逢吉相公不歷晉祠三十年白頭重到

一淒然泉聲自昔鏘寒玉草色雖秋耀翠鈿少壯同遊  
寧有數尊榮再會便無緣相思臨水下雙淚寄入并汾  
向洛川

張仲素

聖神樂云玉帛殊方至歌鐘比屋聞華夷今一貫同賀  
聖明君

海浪恬丹徼邊塵靜黑山從今萬里外不復鏢蕭關  
九陌祥煙合千春瑞月明宮花同苑柳先發鳳凰城  
宮中樂云網戶交如綺紗窗薄似煙樂吹天上曲人是

月中仙

翠匣開寒鏡珠釵掛步搖粧成祇是曉更漏促清宵  
紅果搖池寶金盤露井水甘泉將避暑臺殿水光凝

月彩浮鸞殿  
砧聲遶鳳樓  
笙歌臨水檻  
紅燭乍迎秋  
奇樹留寒翠  
神池結夕波  
黃山一夜雪  
渭水鴈聲多  
春遊云煙柳  
飛輕絮  
風榆落小錢  
濛濛百花裡  
羅綺競  
鞦韆

騁望登香閣  
爭高下  
砌臺林間踏  
青去  
席上意錢來  
行樂三春節  
林花百和香  
當年重意氣  
先占鬪鷄場  
春閨怨云雪  
盡萱抽葉  
風輕水變苔  
玉闕書信絕  
又見  
發庭梅

裊裊邊城柳青青陌上桑提籠忘採葉昨夜夢漁陽  
桂魄初生秋露微輕羅已薄未更衣銀箏夜久殷勤弄  
心怯空房不忍歸

太平辭云風俗今和厚君王在穆清行看採花曲盡是  
泰階平

聖德超千古皇風靜四方蒼生今息戰無事覺時長  
遊春曲云萬樹江邊杏新開一夜風滿園深淺色照在  
綠波中

上苑何窮樹花開次第新香車與絲綺風靜亦生塵

送春辭云日日人空老年年春更歸相歡在樽酒不用

惜花飛

塞上曲云天驕遠塞行出鞘寶刀鳴定是酬恩日今朝  
覺命輕

卷旆生風喜氣新早持龍節靜邊塵漢家天子圖麟閣  
身是當今第一人

贈遠云當年只是守空帷夢見江山覺別離不見鄉書

傳鴈足唯看新月吐蛾眉

厭攀楊柳臨青閣  
閑採芙蓉傍碧潭  
走馬臺邊人不見  
拂雲堆畔戰方酣

閨人思云愁見遊空百丈絲  
春風惹斷更傷離  
閑花落徧蒼苔地  
盡日無人誰得知

秋夜曲云丁丁漏水夜何長  
漫漫輕雲露月光  
秋逼暗蟲通夕響  
征衣未寄莫飛霜

碧窓斜月藹清輝  
愁聽寒螿淚濕衣  
夢裡分明見  
關塞



不知何路向金微

秋天一夜靜無雲  
斷續鴻聲到曉聞  
欲寄征衣問消息  
居延城外又移軍

博山沉燎絕餘香  
蘭燼金檠怨夜長  
為問青青河畔草  
幾回經雨復經霜

天馬辭云天馬初從渥水來  
郊歌曾唱得龍媒  
不知玉塞沙中路  
苜蓿殘花幾處開

躑躅宛駒齒未齊  
拏金噴玉向風嘶  
來時行盡金河道

獵獵輕風在碧蹄

緱山鶴詩羽客驂仙鶴將飛駐碧山映松殘雪在度嶺  
片雲還清唳因風遠高姿對水閑笙歌憶天上城郭歎  
人間幾覺霜毛潔殊知藻質班迢迢煙路逸奮翮詎能  
攀

砌臺即今擦擦臺也仲素詩云寫望臨香閣登高下砌  
臺林間踏青去席上意錢來

仲素字繪之建封之子憲宗以仲素段文昌為翰林學

士韋賢之曰學士所以備顧問不宜專取辭藝罷之後  
終中書舍人

右王涯令狐楚張仲素五言七言絕句共作一集號三  
舍人集今盡錄於此



唐詩紀事卷四十二